

**Timigissarnerup nerisaqartarnerullu sunniiveqatigiinnerisigut timikkut eqqarsaatikkullu inuunermi atukkat qanoq pitsaanerulersissinnaaneri immikkut sammillugit kalaallisut aallakaatitassiornissamut aningaasanik immikkoortitsinissamut Naalakkersuisut peqquneqarnissaannik Inatsisartut aalajangiiffigisassaattut siunnersuut**

(Inatsisartunut ilaasortaq, Andreas Uldum, Demokraatit)

**Akissuteqaat**

(Peqqissutsimut Naalakkersuisoq, Agathe Fontain)

**Aappassaaneerpeqarnera**

Siullermik Ilaqutariinnermut Peqqissutsimullu Ataatsimiititaliaq siunnersuutip matuma peqqissaarullugu suliarisimaneranut qutsavigiumavara.

Ilaqutariinnermut Peqqissutsimullu Ataatsimiititaliap pisariaqartinneqartutut pinaveersaartitsinissamut aningaasaliisoqarnissaa pingaartuutippaa, tamannalu inuiaqatigiit tamarmi-usumik isumalluutaasa pingaarnersiulluni tulleriarneqarnerannut ilaatinneqassaaq.

Naalakkersuisut pinaveersaartitsinermut suliniutit sunniuteqarluartut aamma innuttaasut nalinginnaasumik peqqissuunissaanni pitsannguinerit aqutigalugit isumaginninnermut aamma peqqinnissaqarfimmut aningaasartuutit annikillisinneqarsinnaanerat ilisimaarilluinnarpaat, soorlu aamma amerlanerit suliffimmini suliinnarnissaat tamatumuuna eqqanaarneqassasoq, nassatarisaanillu inuiaqatigiinnut pitsaasumik sunniuteqassasoq. Taakku ataatsimoortikkaanni pinaveersaartitsineq inunnik isumaginnittoqarfinit aamma peqqinnissaqarfimmit sulissunneqarnermiit akikinneruvoq, taamaattumillu siunissaq eqqarsaatigalugu pinaveersaartitsinermut aningaasaliinissaq isumaqarluarpoq.

Ilaqutariinnermut Peqqissutsimullu Ataatsimiititaliap Naalakkersuisut paasissutissiinnermut siunertanullu sunut qanorlu annertutigisunik aningaaanik atuisarnerat ujartorpaa. Ataatsimiititaliamut akissuteqaatinni takuneqarsinnaasutut taamaallaat nammineq Naalakkersuisoqarfimmut tunngasut kisiisa nassuiaateqarfigaakka. Naalakkersuisoqarfiit allat qanoq atuisarneri pillugit paasissutissat katersorneqarniariarpata ataatsimiititaliamut paasissutissiisuttigineqassapput.

Ilaqutariinnermut Peqqissutsimullu Ataatsimiititaliap Nunatta Karsiata imigassanut tupanullu akitsuutinit aammalu equiniaanermi aamma maskiinanut aningaasanoorutitut akitsuutinit isertitat pinaveersaartitsinermi suliniutit aamma sammisap iluani suliniutit imminnut attuumassuteqarnerat oqallisigisimavai. Naalakkersuisut ataatsimiititaliap eqqartuisimanera soqutiginartippaat, taamaattorli akileraarutinit akitsuutinillu iluanaarutit isertitatut allatulli Nunatta

Karsianut nakkartarnissaat, kingornatigullu Inatsisartut Naalakkersuisullu ukiumoortumik ukiumi tullerni isertitassanut aningaasartuutissanullu inatsisitigut tullerriiaarisassasut Naalakkersuisut nalinginnaasumik isumaqarput.

Akileraarutitigut aamma akitsuutitigut isertitat atorlugit aalajangersimasunut aningaasaliinerit politikerit allaffeqarfiillu pingaarnertut suliaasaqarfiillu akimorlugit naleqquttumik tullerriiaarinissamut periarfissaarutitissavaat, soorlu aamma iluanaarutit annertussusii siunissami sammisassani aalajangersimasuni, pisariaqartitsineq piuppat piunngikkaluarpalluunniit sulinitit aalajangiissuuffigilissagaat.

Naalakkersuisut siullermeerinninnerulli kingorna nerisaqartarnej pillugu kalaallisut aallakkaatitassiat aallakaateqqinneqarnissaat eqqanaarsimavaat, aammalu siunnersuuteqartup oqallisissatut saqqummiusnaanut tulluurtunik aallakkaatitassiassat pillugit Nerisaqarnermut Ataatsimiititaliap sinnersuusiornissaa pillugu oqaloqatigisimallugu.

Ataatsimiititaliami amerlanerussuteqartut, tassalu Siumut, Demokraatit Atassutillu inasutigaat siunnersuut maannakkutut iluseqartillugu akuersissutigineqassasoq, ikinnerussuteqartulli, tassalu Inuit Ataqtigiit siunnersuummut siunertaasoq akueraat, isumaqarlutilli Naalakkersuisut allannguutissatut siunnersuutaat, maannakkut ataqtigiissitsillunilu nalilersorlugu, siunnersuutip malitseqartinneqarnissaanut naapertuuttoq.

Naalakkersuisut siunnersuutigineqartutut aallakkaatitassiat piviusunngortinneqarnissaat sulisutigiumavaat, avataaniilli aningaasaliissuteqartoqarnissaanik nassaartoqanngippat tamanna isumaqassaaq pinaveersaartitsilluni iliuuseqarfiusussani allani, soorlu ilaatigut pujortartarnermut, imigassanut timillu aalatitarnissaanut tunngasuni iliuusissat annikillisittariaqassapput.

Tamanna tunuliaqutaralugu Naalakkersuisut siunnersuutip akuerineqannginnissaa innersuusutigaat.